

[Nürnberg], 26. September [1546]

An Joachim Camerarius d. Ä.

BSB, Clm 10370, Nr. 233.

Clarissimo et optimo viro, D. Ioachimo Camerario etc. amico suo plurimum obseruando.
Leiptzg.

S. D. Diu conticuere musae tuae, (quod ad me quidem attinet) hisce bellicis fortasse tumultibus minus alacres. at meae picae garrire non desinunt, tametsi videant se parum gratiosas esse. Quae quanquam ineptae sint et importunae saepe (nec enim crimen hoc nego) excusationem tamen habent aliàs officij, aliàs necessitatis, si tamen apud humanitatem tuam excusatione mihi opus est. Nunc vero huic optimaie indolis adolescenti literas ad te dare quasi coactus sum. Praeceptore vsus est Argentinae fratre meo Henrico, ibique modestiam ingenium et diligentiam suam probauit omnibus quibus notus fuit. Ego quoque suavitate morum eius dum mihi discipulus fuit, valde sum delectatus. Nunc vero, (postquam ei parentis nescio quo consilio Argentorati manere non licuit) valde ei gratulor profectionem istam ad vos. Nam hic ob impedimenta domestica et crebra, studia non ita colere potuit quemadmodum ipse aut voluissest aut debuissest. Ac singulari studio te oro, vt, quantum in te erit, quantumque sine tua molestia facere poteris, operam des vt illius studijs quam optime consulatur, moresque nec prauis sodalitijs nec voluptatum puellarium illecebris corrumpantur. a quorum vtroque non paruum apud vos esse periculum intelligo. Sed haec tibi (quod gratissimum mihi erit) curae futura scio. Me nefariorum quorundam hominum scelera e nosodocheo cum eiecissent, hic quidam τῶν δοκούντων, suis χρηστολογίαις retinuerunt hactenus. Hospitio clarissimi et mihi carissimi viri vtor perbenigno et liberali Christophori Iulij Iureconsulti. Pauculos quosdam pueros, nescio quanto cum ipsorum fructu, nullo certè meo emolumento doceo. Caetera si quaeris Hic status, haec rerum nunc est fortuna mearum debeat vt lachrymis nullus adesse modus. Sed valeant lachrymae. <ἀλλὰ γὰρ κούφως φέρειν>¹ χρή θνητὸν ὄντα συμφορὰς. 26 Sep<tembris Anno 46.>

Hiero[nymus] Lycius.

¹Textverlust ergänzt nach Wolfs Brief an Camerarius d. Ä. vom 5.11.1571.